

# SAN JUAN KARTA NMEHTEWE'SX

---

## Gayo ew yūuna fxi'zeni's we'weni

<sup>1</sup>Thêj jīna kxsusu'tx txāath fxi'ja' naa karta's adx peeygāanisa Gayo's weçxana.

<sup>2</sup>Yakhthêj peeygāanisa, adxa' iidx pa'gate Dxus yakh puutx we'wena ūsthu kīhtewa ewçxáa āça'mée fxi'zekahn, ma'wēga Dxus yakh çxhāçxha fxi'ze' txā'wēy. <sup>3</sup>Idxa' Dxus we'weni isasa's jxpubamée Dxus yakh ew fxi'zeni's yakhthêjwe'sx pa'lçxa pta'sxte', wala weçxath. <sup>4</sup>Adxa' kīh yuhnawa txā'wē yu' weçxa'çmeeth, naasáa adx luuçxwe'sx txā'wē Dxus we'weni isasa's jxpubamée ūsta' jīna pta'sxni yuuçxáak jxthaakwe ja'weçxa'.

<sup>5</sup>Yakhthêj peeygāanisa idxa' bagaçxtewa pu'vxitumée selpiina ūsgu vxite kiweju yakhthêjwe'sx kxtee pa'l'satx pu'çxna. <sup>6</sup>Txāawe'sxa' ayte yakhthêjwe'sx pkhaakhenite pta'sxtxi iidx peeygāhna pu'çxni's. Txāasa bagaçxtewa meen pu'çx txāawe'sx dxi'the u'jwa'lj peejini's Dxus weçxakahn. <sup>7</sup>Txāawe'sxa' kasehtx Jesukristo kaapiya'jni's pta'sxna u'juya', nawa dxi'the u'jwa'lj peejini's pēyi'çmeeta' Dxusa's jiimeesa yuutxi's. <sup>8</sup>Txāa pa'ga kwe'sxa' kīh peejiçtewa pu'çxhi ji'ptha'w Dxus we'weni isasa's pta'sxsatxi'. Txā'wē yūunisa Dxus yuwe's jxukaysa ja'daçxah mjīini yaase'.

## Diótrefxes ewmée yūuna fxi'zeni

<sup>9</sup>Adxa' teeçx karta fxi'th kxtee pkhaakhesawe'sxtxi, nawa Diótrefxes yu' nwēese'jme' kwe'sx we'weni's txāaçxáa jxkaahna ūs wēeçxa. <sup>10</sup>Txāa pa'ga adxa' pa'lçxa txā'sa' pa'yaçxa we'we'nja, txā'wē yuwe susna kwe'sxtxi nuywe'wena u'jupa'ga. Txā'wēçxáa yūumée, vxite ekaju yakhthêjwe'sx pa'l'satx jxpa'ga'çme', sa' vxite jxpa'ga wēesa yuutxi's ahçeçxa txāa pkhaakhenijū kutxi'ji'k.

<sup>11</sup>Yakhthêj peeygāanisa, ewmeesa na'wēy yu' fxi'zewa'jme', naasáa ewsa ma'wē fxi'zeçte', txā'wē yuuçxáa fxi'zewa'ja'. Ew yūuna fxi'zesa'

Dxus yakh fxi'zesa'. Nawa ewmée yūusa', Dxus yakhmée fxi'zesaçxa txã'wẽ yuuna.

#### **Demetrio ew fxi'zeni**

<sup>12</sup>Demetrio' wala ewsa' jīnatx we'we' jxukaysa. Txã'wẽ ew fxi'zete', txajx ew fxi'zeni íiçxáa nwe'we'k. Aça' kwe'sxwa jiitha'w txã'wẽ ew fxi'zeni's. I'kwe'sxa' peekx jii i'kwe kwe'sx isa we'weni's.

#### **Nmehte we'wena fxi'jni**

<sup>13</sup>Adxa' wala puutx we'wewa'j ji'pthu, nawa fxi'jçxa kajaçmeeth, <sup>14</sup>dud puutx uyçxa puutx we'we'nja sūhçxa.

<sup>15</sup>Ayjuwe'sx namiku idxa's wala yuwe weçxaa kaja'tx. Kxsū namikuwe'sxtxiwa teeçxa na'wẽçxah yuwe meen weçxa. Dxus yakh mfxi'ze.